

RoMa's Reise-Blog



RoMa-Express

Das isch expressmässig gange:
Vo Rothrist nach Olten, denn entspannendi 6 Minute im FLIRT
nach Tecknau und denn als RoMa-Express s'Tal durab richtig
Heimat. D'Ro Loki het dr Ma-Ahänger zu Höchschleischtige
chönne azieh..

So sind mir nach 315 gfarene Kilometer wieder guet deheime
acho.

Bis zum nöchschte Johr,
RoMa

Eintrag vom 04.08.2008 - 19:26:39 [x](#)



Rothrist

Wenn mr scho bi de Traditione sind, wei mr nach em Träffe mit
ToSy au grad in dr richtige Reihefolg wytermache...
Vo Rüttene us isch es denn nomol 45Km bis uf Rothrist gsi.
Mit es paar Sightseeing Abstächer (Originalton Ma), sprich
offizieller Veloroute, sind mr uf schnällschtem Wäg, sprich Haupt-
und Näbestrosse, zu PaMa Kissling gfare.
Nach enere erfrischende Duschi si mir mit emene feine z'Nacht
verwöhnt worde.
S'Dessert isch klar en Agriff uf Eusi abgstramplete Kalorie gsi!
Jetzt freue mir is uf e Nacht imene richtige Bett...
RoMa

Eintrag vom 03.08.2008 - 21:02:20 [x](#)



Brunch

Do euses "Canadaträffe" grad eso uf em Wäg gläge isch, sy mir hüt
am Morge vom Camping in Solothurn imene kurze Bärgsprint uf
Rüttenen gschpurtet.
Im neue Dehei vo Sybille und Thomas hets e super Brunch geh.
Andrea und Roger hei mit ihrem Birchermüesli (ganz ohni
"artificial Flowers" :-)) au no e feine Bitrag gleischtet. Merci!
D'Feriebilder vo ToSy hän zumindescht bim Ro scho echli
Canadaweh usglöst...
Ei grosse Vorteil vo euse Ferie isch aber nid vo dr Hand z'wyse:
Eusy Ferie sind au das Johr CO2-neutral...
(Abgseh vielleicht vo eusem persönliche Metan-usstoss ;-))
RoMa

Eintrag vom 03.08.2008 - 20:09:16 [x](#)



Gruessen


Es isch also scho no interessant : Au bi de Velofahrer gits verschieden Lager. Das heisst es git Rennvelofahrer und anderi. Rennvelofahrer grüesse Turefahrer grundsätzlich nid. Anderi Velofahrer grüesse sich uf de Velowäg. Hüt hei mir zu dere Regle denn au no d'Usnahm gfunde: Rennvelofahrer mit Bart grüesse.

Vo Bärn us sy mir mit dr RBS bis nach Solothurn, wo mir jetzt au nomol euses Zält ufgschlge hän...

Jetzt hei mir grad es feins Znacht in dr Altstadt gnosse...

RoMa

Eintrag vom 02.08.2008 - 21:00:52 [x](#)



Express

Nach viel Gegewind bi dr Talfahrt (vorallem d'Ma het vo mim Windschatten chönne profitiere) sy mir jetzt im IC nach Bärn unterwägs.

Knapp hei mir für eusi 2 Lastesel no platz gfunde....

Vo Bern us gohts denn no wyter...

RoMa

Eintrag vom 02.08.2008 - 15:38:33 [x](#)



Ziel erreicht

Uff, mir heis gschafft. D'Ma het zwar gfunde, mini Sightseeing Usflüg wäre denn scho nid nötig, dr bi sy mr jo nur em Velowäg gfolgt.. ;-)

Nach insgesamt 183 Km hei mir Euses Ziel d'Länk erreicht. Trotz churze Gwitter sy mir, abgeh vom eigene Schweiss, fascht troche acho. S'Vordach bimene Coiffeur und e Flugzüg Hangar (diräkt näbeme Hunter) hei eus als Unterstand dient.

Jetzt gniesse mir 2 Tag mit Nicole, Rahel, Noah und Jaron in dr Länk.

Es feins Kaffi im Kuhn und öppis drzue lyt nach dene Strapaze allemol drin...

RoMa

Eintrag vom 30.07.2008 - 20:29:25 [x](#)



Mittagsrast

Au eusi Gaschtgäber sind letscht Nacht vom Gwitter überrascht worde. Heftig isch es über eus gsi. Zumindescht Blitz und Donner. Räge hets denn gar nid eso viel geh.

Am morge sind mr denn no mit emene feine Zmorge im Buch gschtartet.

Inzwüsche sind mr bereits via Thun und Wimmis ins Simmetal iboge.

An dere geniale Schweizer Familie Füürstell uf em Bildli gniesse mir grad Euse Mittagshalt.

Es sind scho einigi Höhemeter hinter eus, doch eis isch sicher: Es het no einigi Stigige vor Eus.

RoMa

Eintrag vom 30.07.2008 - 13:04:21 [x](#)



Uf em Hund

Nach 105 Km und total 752 Höhemeter sind mr uf em Hund.. Vom Hauestei isch es via Balsthal, Wangen a.A., Biberist, Kirchbärg, Burgdorf, Schafhausen bis nach Geysenstein wyter gange.

Do sy mr uf dr Glauser - Ranch abschtige.

Falls Dir das uf dr Charte nid findet, was durchus chönnti sy, do no die genaue Koordinate vo eusem Zält:

612.029

194.339

Jetzt freue mir is uf's Z'Nacht mit Elisabeth und Thomas.....

Eintrag vom 29.07.2008 - 19:26:10 [x](#)




Znueni

Wenn gwüssi erscht afange schaffe, si mir scho bim Znüni uf em obere Hauestei acho.

Jetzt folgt denn grad dr beschi Teil vo hütte: D'Abfahrt nach Balsthal.....

Eintrag vom 29.07.2008 - 09:13:14 [x](#)



Staerkung

Jetzt gilts ärnscht. Nach dere Stärkig gohts denn scho gli los.

Mir hoffe, dass eus die Gwitter in rueh lön und mir möglichscht troche chönne fahre.

RoMa

Eintrag vom 29.07.2008 - 06:14:59 [x](#)

Kurzer Endspurt

Nach emene churze Endspurt über e untere Hauestei sy mir hüt Nomitag guet wieder dehei acho.

Total hei mir in de letschte 9 Tag 475 Km im Sattel verbrocht. Eusi Hintertteil hei sich in dere Zyt guet an d'Sättel gwöhnt. Ansunschte hei mir weder Muskelkater no sunschtigi Velospezifische



Beschwärde z'beklage.

Inzwüsche sy eusi Dohtesel abpackt und im Stall, eh Garage versorgt.

Au Ro + Ma hei e usgibigi Duschi gnosse. D'Ma kämpft jetzt no mit ihrer Verchältig, wo si sich geschter igfange het....

Gfreut hei eus au Euchi Reaktionen, liebi Blog-Läser! Merci für Euches Interässe!

Natürlich hei mir nid über alles gschriebe, denn nur so hei mr no e paar Gschichtli und Anekdote wenn mir is bi Glägeheit wieder gsehn....

Liebi Grüessli
RoMa

Eintrag vom 31.08.2007 - 18:14:30 [x](#)



5 Sterne Unterkunft

Nachdäm mir vo dr Unterkunft in Andermatt einigermasse enttüscht gsi sind, sy mir geschter zobe buechstäblich verwöhnt worde. Sälbergmächti Chnöpfli, mmhhh!!

Ohni störige vo obe oder näbe dra hei mir au wieder emol e wirklich ungschtörti Nacht gha.

Uf däm Wäg nomol beschte Dank an PaMa Kissling für ihri Gaschtfründschaft.

RoMa

Eintrag vom 31.08.2007 - 17:39:07 [x](#)



Kampfzone

Hüt het's genau drei Gruppe vo Lüt wo dusse mehr oder weniger freiwillig unterwägs sind: Pöschtlter, Soldate und RoMa...

Bi eusem Start in Luzärn hets wirklich us allne Löcher gschüttet. Entsprechend sy mir au scho gli nass gsi. Die ganze Bäch hän dütlich mehr Wasser gfuehrt als normal.

Bi Emme hei mr d'Wattiefi vo eusne Velos chönne teschte. Inere Unterfuehrig wo mir hei dure müesse isch s'Wasser über 20cm tief gschtande. Ohni Schnorchel isch es no guet gange, nur dr Ma ihri Füess hei es zuesätzlichs Bad gnoh.

Nach de gröschte Stigige het ab Sempach doch s'Wätter langsam erbarme becho. Ab Sursee isch es denn scho fascht guet gsi....

So si mir nach emene Tenuewächsel zumindescht vo usse troche in Rothrist achto.

Nach em Gfängnis gniesse mr jetzt für e Nacht dr Komfort vo dr Ma ihrne PaMa...

RoMa

Eintrag vom 30.08.2007 - 17:18:44 [x](#)

Entscheidig no vertagt



Im Momänt isch do bi eus das mit em Wätter immer no so e Sach. Mir montiere jetzt denn bald Schwimmer an eusi Velos und chömme denn eso via Reuss, Aare und Rhy heimeszue.... Vorerscht verbringe mr jetzt denn aber nomol e Nacht hinter Schloss und Riegel. Wie's wyter goht entscheide mir denn morn am Morge.

Guete Nacht
RoMa

Eintrag vom 29.08.2007 - 21:13:24 [X](#)



Wetter

Eusi erschti Nacht im Gfängnis hei mir guet überstande. Wenn me die Türe nid vo inne chönnti ufmache wüdi die Sach scho no anderscht.... Hüt am Morge sy mir uf all Fäll nid vomene Wärter sondern vomene heftige Gwitter geweckt worde. Do's au jetzt nid so amächelich isch hei mir is an e Fänschterplatz im Starbucks verzoge.... (Wenn me do frogt bechunnt me e 30 Minute gratis Internet Zuegang! :-))

RoMa

Eintrag vom 29.08.2007 - 12:31:24 [X](#)



Spontaner Ausgang

Gottseidank, hei mir in Hafturlaub dörfe! Nur so isch das spontane Träffe mit Sibylle und Thomas möglich gsi. Mir hei dä Obe uf all Fäll mega gnosse. Mit Gfängnischuchi het dä Italiener au nid viel gmeinsam gha... Nomol beschte Dank an die zwei frisch verhürotete für dä gmüetlich Obe!

Pünktlich zrug zum Zimmerverläse in Zälle 210;
RoMa

Eintrag vom 29.08.2007 - 00:00:18 [X](#)



Im Knast

Dank em Wätter si mr jetzt no ins Gfängnis cho! Luzärn het is grad mit emene Gwitter empfangen. Nach däm sehr durchzogene Tag het das scho grad uf d'Lune druckt. Entsprechend isch s'Resultat: Drmit mir nid grad in nöchschte Zug heimwärts ghockt sind händ si is ins Gfängnis gschteckt. So teile Ro und Ma jetzt e Zälle mit WC, Brünneli, Duschi, zwei Better und emene Tischli. Eusi Zällenummere isch 210, nur falls is öpper inere küehne Aktion wetti cho befreie oder eus e Chueche mit Feile schicke!

Us Zälle 210
RoMa

Eintrag vom 28.08.2007 - 23:46:06 [x](#)



Der Uri-Stier wehrt sich


Nachdem mr geschter no d'Talfahrt vom Oberalppass hei chönne gniesse, isch hüt s'Wätter nümme ganz uf eusere Syte. Scho am morgge, z'Andermatt no im warme Bett, hei mir entschiede uf euses Furka-Projekt z'verzichte. (Aufgeschoben ist nicht aufgehoben).

Dorum hei mir is nach längerem wehrweise entschiede, dass mir is em Uri-Stier stelle. Bi Gegewind und sehr wächselhaftem Wätter si mir jetzt bis uf Flüele cho.

Jetzt gniesse mir denn scho gli e Schiffahrt Richtig Luzärn....

RoMa

Eintrag vom 28.08.2007 - 13:25:59 [x](#)



Happy Birthday

Uf däm Wäg möchte mir em Lars ganz härzlich zu sym hüttige Geburtstag gratuliere. Mir hoffe Du hesch hüt zobe scho no es paar Gäscht, obwohl mir zwei jo unterwägs sind.... ;-)

Liebi Griess us em Zwüschehalt Disentis

RoMa

Eintrag vom 27.08.2007 - 14:42:54 [x](#)



E mol anderscht

Wie dir em Bild entneh chönnet, hei eusi Drohtesel Stahlräder becho.

Nochdäm mir vo Buchs uf Chur pedalet si, isch dört scho d'RHB parat gschtande... Und wär cha so es Angebot in Anbetracht vo de Höhemeter wo mr jetzt grad überwinde usschlo?

Us em fahrende RE 1232

RoMa

Eintrag vom 27.08.2007 - 13:29:52 [x](#)



Sand im Getriebe

Chuum si mr wieder es paar Kilometer gfahre, isch in Rorschach bereits dr nöchschti Event gsi. E internationale Sandskulpture Wettbewärb het is aglockt. Wahnsinn was die Künschtler do gschaffe hän. Uf em Bild isch isch dr 2. Platzierti Bitrag, wo aber dr Publikumspris gwunne het.

Vo dört a isch es denn aber gloffe wie gschmiert. Dr Bodensee isch

scho bald hinter is gsi. Entlang vom alte Rhy hei mir inzwüsche s'dritte Land erreicht. Im öschterrichische hei mr e paar schöni Kilometer abschpuelt, bevor mr denn als Rhy-Express gschartet sind. Dank em Ruggewind isch es scho fascht voremenelei gloffe. So hei mir euses Etapeziel Buchs nach 88 Km scho um die vieri erreicht.

RoMa


Eintrag vom 26.08.2007 - 18:01:15 [x](#)



Gegeverkehr

So viel Velo-Gegeverkehr hän mr jetzt wüchlich no nie gha! Kei Wunder: Zwüsche Romanshorn und Arbon isch hüt au e Slow Up gsi... E mega cooli Stimmig! Aber mir si, wie uf dr ganze bishäriige Tour gegene Strom gschwumme.... So si is hütte nid eifach es paar Velo- und Rollerbladfahrer entgegecho, sondern grad hunderti!

Eintrag vom 26.08.2007 - 17:33:59 [x](#)



E Tag zum gniesse

Hüt hei mr e ganz entspannte Tag verbrocht. So richtig zum gniesse:

Bi dr Marion hets die erschte Liche geh und au in mim Buech isch dr Kommissär Hunkeler scho flissig am ermittle. So isch hüt die gröschti Distanz wo mir zugg gleit hei, zwüsche Syte 1 und 86.

Amene settige Gniessertag darf natürlich au dr Gaume nid z'churz cho. Do am See isch jo klar was es git: Fisch, natürlich.

Inzwüsche sin per SMS au scho die erschte Froge itroffe: S.M. us St. wett wüsse:

'Wie gohts mit Muskelkater und Füdliweh?'

Muskelkater hei mr beidi nid. Das mit em Hinterteil chunnt denn morn uf em Sattel wieder us.... Bis jetzt würde mir sälbschtverständlich jedi Dopingkontrolle problemlos bestoh!

Morn gohts denn vorerscht emol em Bodensee entlang wyter oschtwärts.


Uf ufmunterndi SMS und Wätterprognose freue mir is jederzyt!

RoMa

Eintrag vom 25.08.2007 - 22:45:31 [x](#)

Landjaeger

Fuchs du hast die Landjäger gestohlen....



Ganz gklappt hets nid. Immerhin het dr Meister Reinecke s'gschafft eus hüt z'Nacht uf trab z'halte.

Als erscht hets an eusem Abfallsäckli graschlet. Guet - zum Zält us und s'Säckli uf e Baum, zrug und wyterschlofe.

Nach enere Stund dr nöchschti versuech. Denn isch wohl dr Duft vo de Landjäger so verlockend gsi, dass är het müesse an dr Velotäsche chratze... Also s'ganze Spieli nomol: Zum Zält us und d'Landjäger uf e Baum....

Das het gfruchtet.....

Tja, in Canada wär's denn nid nur e Fuchs gsi.... Gäll Thomas und Roger!

Eintrag vom 25.08.2007 - 08:32:45 [x](#)

Kein Rheinfall

Chum vom Camping los, hei mr bereits es erschts Highlight entdeckt: E Biber het sich allem Aschin ah e bitz es z'grosses Projekt vorgnoh. Sini Spure sind aber dütlich z'gseh gsi... Dr Umfang vom Baum isch zwüsche 2.5 und 3 Meter gsi!

Zrug uf dr offizielle Route sind mir scho bald am Rhyfall gsi. Dohär stammt au euses Tagesbild.

Nach Schaffhuse isch dr Wäg denn mehrheitlich diräkt am Rhy a verloffte.

In Diessenhofen hets denn zmittag geh. Dört hei mir au dr 'Umbau' vomene Rhyschiff zumene Cabrio chönne verfolge. Denn nur so losst sich die historischi Holzbrugg passiere.

Churz nach de 6i isch denn euses Tageszyl erreicht gsi. Do uf em Camping in Altnau sind mr vo dr Platzwartin unkompliziert empfangen worde. Churz druff isch au scho euses Zält gschtande und dr Tagesschweiss unterwägs in Richtig Kläranlag gsi.

Wär dänkt mir würde is nur vo Sandwich und Fertigpasta ernähre irrt sich. Hüt hets en feine Pilz-Landjäger-Risotto geh. Mmmhhh.....

Morn näme mr's denn e bitz ruhiger...

Bis denn....

RoMa

Eintrag vom 24.08.2007 - 22:37:07 [x](#)



Nid ganz 100....

Die erschti Etappe wäri also gschafft.

Nach eusem Start genau am 9i hei mir euses Ziel Flaach nach 99.31 Km wohlbehalte erreicht.

Was eus unterwägs am meischte ufgfalle isch: Wenn me dr offizielle Route folgt, fahrt me also scho e bitz im Cacao umme. Im Gegesatz dodrue chönne d'Autifahrer eifach ebe und gradus e halbi Autobahn für sich in Aspruch neh.

Bis Schwaderloch si mr ohni längerer Pause dure pedalt. Nach em

Zmittag isch es denn wyter gange. Langsam hei sich denn au die erschte Ermüedigsterschinige zeigt. Churzi Päuseli sin hüffiger worde.

Die letschte 10 Km si denn mit 110 Höhemeter uf 4 Km grad nomol happig worde.

Uf em Camping acho hets nur no zwei Prioritäte geh:

1. Dusche
2. Z'Nacht ässe

Wie Dir gsehnd, hei mir is vorzüglich verpflegt....

Jetzt gniesse mr no dr Räscht vom Obe diräckt am Rhy.

RoMa

Eintrag vom 23.08.2007 - 20:53:44 [x](#)



Startklar

Nun ist es also soweit. Wir sind startklar.

Morgen fahren wir los. Unsere Fahrraeder sind gepackt und warten in der Garage auf Ihren Einsatz.

Vorerst geniessen wir noch einmal unser bequemes Bett zu Hause um uns morgen entspannt auf den Weg zu machen.

RoMa

Eintrag vom 22.08.2007 - 17:10:33 [x](#)



Anders als man denkt....

Tja, so sei es nun.

Saemtliche Reisegoetter haben sich auch dieses Jahr wieder gegen uns verschworen:

1. Der Wettergott, er hat sich wohl im Kalender getaeuscht und ist vom Fruehling gleich zum Herbst uebergegangen.
2. Der Eisenbahngott, er hat beschlossen, dass auf allen passenden Zuegen die Fahrradplaetze ausgebucht sind.

Wir beugen uns diesem Druck und sind flexibel.

So sieht nun unser Plan aus:

Abfahrt ist am Donnerstag Morgen.

Doch statt dem Rhein flussabwaerts zu folgen, werden wir gegen seinen

Strom schwimmen. Ziel: Bodensee....

Wohin es von dort aus geht wissen wir heute noch nicht.

RoMa

Eintrag vom 21.08.2007 - 22:58:57 [x](#)

